

2

# EPITHALAMIVM Auraico-Britannicum

ILLVSTRISSIMO & CELSISSIMO

DOMINO Dn. GVLIELMO JUNIORI

PRINCIPI AURAICO,

ILLVSTRISSIMI & BELLICOSISSIMI HEROIS

FRIDERICI HENRICI,

Principis Auraici, Comitis Nassovia, Catti-  
meliboci, Viandæ, Meursæ, &c. Marchionis Veræ &  
Flissingæ, Domini & Baronis Bredæ, Gravie, &c. Vice-  
Comitis Hæreditarii Antwerpæ & Vesuntii, &c.

Gubernatoris Geldriæ, Hollandiæ, Zelandiæ,  
West-Frisiæ, Zutphaniæ, Ultrajecti, Trans-Isulaniæ, Gro-  
ningæ & Omlandæ, Drentiæque, Supremi Militiæ Fœderati  
Belgii Ducis, & Generalis rerum maritimarum Præfecti,  
Regiæque Ordinis aureæ Periscelidis Equitis,

*Filio Sponso,*

Cum

Illustrissima & Excelsissima Principe

MARIA BRITANNICA

Serenissimi & Potentissimi Magnæ

Britanniæ, Franciæ & Hiberniæ

Regis CAROLI, Fidei Defensoris,

*Filia Sponsa,*

Felicibus D. E. I. auspiciis 2. die Maji, Anno Christi 1641

*Londini in Albaniæ Regali solennitate nuptiarum  
celebranti decantatum*

Autore *Johanne Sifere Bohemo.*

Ode Alcaica Votiva  
*Ad Illustrissimum Principem*  
*Atrausionensem Sponsum.*

**P**rofer canoram Calliope chelyn  
Succincta Musis octo Sororibus,  
Regalis Hymen personabit  
Ad Tamefim lituis triumphos.

Excelsa Virtus Auraicæ Domûs  
Sat nota terris Marte per æthera,  
Quâ Phœbus exultans ab ortu  
Hesperium repetit cubile.

Bellax Tuisco Nassovidum Genus  
Famæ perennis tollit honoribus:  
Adolphus Alberto peremptus  
Cæsareæ meminit Coronæ.

Sic ex favillis flamma fit ardua,  
Lymphis domari sæpeque nescia,  
Donec medullis arbor usta  
In cineres fuerit redacta.

Fallax Iberus fraude nefariâ,  
Delphisque cædis sat sibi conscius,  
Tolli putabat Gulielmum  
Pro Pietate DEI Columnam;

Sed spe nefandis excidit ausibus,  
Phoenix renatus pulvere Martio,  
Mauricius, manes Paternos  
Vltus erat Batavorum Achilles.

Par Marte Fratri Magnanimus Pater,  
Henricus, almæ Pacis adorea,  
Prudentiâ, fortiquè dextrâ,  
Expedit Ordinibus trophæa.

Testes manebunt perpetuâ fide  
Sudore tanto capta tot oppida,  
Munita vallis exciderunt  
Sceptringero manibus Philippo.

Sylvæ Ducalis robur aquis viret,  
Et quâ profundus trajicitur Mosa,  
Rheniquè castrum Schenckianum  
Herculei specimen laboris.

Hæreditatis grande peculium,  
Belli palæstra atquè area nobilis,  
Devicta vi triquetra Breda  
Præda fuit proprio Dynastæ.

Quæ penna Lauros enumeret Sacras,  
Queis Martis amplo sydere gloria  
Heroas Orbi procreatos  
Stemmata Nassovio coronat!

His, Sponse, natus belligeris avis  
Vinclo Britannis jungere Regibus,  
Quos stirpe Normannâ Gradivo  
Terribiles statuit vetustas.

Lætare foelix auspiciis DEI,  
CHRISTOQUE cœli Præsîde Pronubo,  
Dum Principi Princeps Virago  
Nubit amore pari Maria.

Arridet anni tempus amabile,  
Veris voluptas, connubio Sacro,  
Augusta Lux est Mense Majo,  
Auraicæ Domui secunda.

Magnus Monarcha ipse Albionis Socer,  
Vultu verendo & lumine, Carolus,  
Dat vota, Regalemque Natam  
Mente, manuque locat benignâ.

Applaudit omnis turba fidelium,  
Nunc congregati Numine prævio  
Congratulantur Foederatis  
Ordinibus Proceres Britanni.

I, quò probatus Coelituum Favor  
Heroico te pectore destinat,  
Donec Gubernator futurus  
Accumules Patrios honores:

Sed corde suavi Nympha Britannica  
Solamen extet rebus in arduis,  
Ut Martiâ Virtute clarus  
Auraidas Batavis propages.

